

Na osnovu člana 15. Zakona o principima lokalne samouprave u Federaciji BiH ("Službene novine FBiH", br. 46/08 i 51/09), člana 57. Statuta Općine Ilijaš – prečišćeni tekst ("Službene novine Kantona Sarajevo", broj: 20/09 i 46/18), člana 16. i 17. Zakona o poticaju razvoja male privrede ("Službene novine Kantona Sarajevo", br. 29/15) i člana 6. Odluke o podsticaju prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2022. godini ("Službene novine Kantona Sarajevo", 10/22), Općinski načelnik putem Službe za privredu i finansije Općine Ilijaš, **d o n o s i:**

P R A V I L N I K
o uslovima, kriterijima i načinu provedbe Odluke o podsticaju prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2022. godini

OSNOVNE ODREDBE

Član 1.

Ovim Pravilnikom utvrđuju se uslovi, kriteriji i način provedbe Odluke o podsticaju prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2022. godini (u daljem tekstu "Odluka o podsticaju").

Član 2.

Cilj podsticaja iz člana 1. ove Odluke je podrška pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2022. godini, radi samozapošljavanja, odnosno podrške u početnoj fazi obavljanja djelatnosti.

KORISNICI PODSTICAJA

Član 3.

Korisnici podsticaja su djelatnosti fizičkih lica, registrovane kao osnovno zanimanje na području Općine Ilijaš sa prijavljenim početkom rada u periodu 01.01.2022. godine do 31.12.2022. godine u skladu sa Zakonom o obrtu i srodnim djelatnostima ("Službene novine FBiH", br. 75/21), koji ispunjavaju uslov kontinuiranog rada u trajanju od minimalno 3 (tri) mjeseca od dana prijave početka rada (obavljanja djelatnosti), izuzimajući djelatnosti iz oblasti: poljoprivrede i saobraćaja (taksi prijevoz, autoprijevoz, auto škole i sl.).

Korisnici podsticaja ne mogu biti lica koja su u proteklom periodu od 12 (dvanaest) mjeseci izvršila odjavu djelatnosti, koja je bila registrovana na području Općine Ilijaš u skladu sa Zakonom o obrtu i srodnim djelatnostima, izuzimajući djelatnosti iz oblasti: poljoprivrede i saobraćaja (taksi prijevoz, autoprijevoz, auto škole i sl.).

Korisnici podsticaja ne mogu biti lica koja koriste aktivnu podsticajnu mjeru drugog nivoa vlasti po bilo kojem osnovu u momentu prijave na Javni poziv.

U skladu sa Uredbom o uslovima i postupku za dodjelu pomoći male vrijednosti-de minimis pomoć ("Službene novine Federacije BiH", br. 27/18), korisnici podsticaja su dužni priložiti Izjavu o visini korištenih "de minimis" pomoćima i drugim državnim pomoćima u BiH.

POSTUPAK OSTVARIVANJA PRAVA NA PODSTICAJ

Član 4.

Korisnici ostvaruju pravo na podsticaj putem Službe za privredu i finansije Općine Ilijaš na bazi Javnog poziva, koji će kontinuirano trajati od dana njegove objave do 31.12.2022. godine.

Javni poziv će biti objavljen putem web stranice Općine Ilijaš (www.ilijas.ba) i na oglasnoj tabli Općine Ilijaš.

Kao datum objave Javnog poziva uzima se datum objave putem web stranice Općine Ilijaš.

Tekst Javnog poziva će biti pripremljen u roku od 7 (dana) od dana stupanja na snagu ovog Pravilnika putem Službe za privredu i finansije. Sastavni dio Javnog poziva je Obrazac zahtjeva za ostvarivanje prava na podsticaj.

Član 5.

Korisnik podsticaja mora ispunjavati propisane uslove utvrđene Odlukom o podsticaju i ovim Pravilnikom.

Dokazi koji se pribavljaju putem Službe za privredu i finansije po službenoj dužnosti su sljedeći:

- a) Rješenje o registraciji djelatnosti fizičkog lica u skladu sa Zakonom o obrtu i srodnim djelatnostima ("Službene novine FBiH", br. 75/21)
- b) Uvjerenje Službe za privredu i finansije da aplikant (fizičko lice) u proteklom periodu od 12 (dvanaest) mjeseci nije odjavio djelatnost koja je bila registrovana na području Općine Ilijaš u skladu sa Zakonom o obrtu i srodnim djelatnostima, izuzimajući djelatnosti iz oblasti: poljoprivrede i saobraćaja (taksi prijevoz, autoprijevoz, auto škole i sl.)
- c) Uvjerenje Službe za privredu i finansije da je registrovana djelatnost aktivna (nije izvršena trajna ili privremena odjava obavljanja djelatnosti) na dan podnošenja prijave na Javni poziv
- d) Uvjerenje Službe za privredu i finansije da je registrovana djelatnost aktivna (nije izvršena trajna ili privremena odjava obavljanja djelatnosti), po isteku perioda od 3 (tri) mjeseca od dana izvršenja I (prve) tranše finansiranja, što je potrebnii uslov/dokaz za izvršenje II (druge) tranše finansiranja.

Dokazi koje korisnik podsticaja (aplikant, odnosno vlasnik obrta ili obrtu srodne djelatnosti) prilaže u postupku prijave na Javni poziv ili po obavijesti/pozivu o ispravci zahtjeva/podneska su sljedeći:

- e) Izjava aplikanta o visini korištenih "de minimis" pomoćima i drugim državnim pomoćima u BiH (uz obaveznu ovjeru potpisa aplikanta, davaoca Izjave kod nadležnog organa uprave ili notara)
- f) Izjava aplikanta da nije korisnik aktivne podsticajne mjere drugog nivoa vlasti po bilo kojem osnovu u momentu prijave na Javni poziv (uz obaveznu ovjeru potpisa aplikanta, davaoca Izjave kod nadležnog organa uprave ili notara)
- g) Izjava aplikanta da će doznačena podsticajna sredstva iskoristiti poštivajući odredbe člana 7. ovog Pravilnika
- h) Uvjerenje o poreznom identifikacionom broju – ID broj (ovjereni kopija)
- i) Bankovni račun registrovane djelatnosti na koji će se doznačiti podsticajna sredstva (Ovjereni kopija potvrde/uvjerenja banke)
- j) Prijava na obavezno osiguranje aplikanta u Poreznoj upravi FBiH (Ovjereni kopija obrasca JS 3100).

Član 6.

Pravo na podsticaj se utvrđuje Rješenjem o dodjeli podsticaja. Doznaka sredstava prema korisniku podsticaja, uz uslov ispunjenosti propisanih uslova utvrđenih Odlukom o podsticaju i ovim Pravilnikom se vrši kroz dvije tranše finansiranja:

- I (prva) tranša u iznosu finansiranja od 2.000,00 KM se izvršava u početnoj fazi biznisa u roku od 7 (sedam) dana od dana pravosnažnosti Rješenja o dodjeli podsticaja,

- II (druga) tranša u iznosu finansiranja od 1.500,00 KM se izvršava po isteku roka od 3 (tri) mjeseca od dana uplate I (prve) tranše finansiranja uz uslov kontinuiranog obavljanja djelatnosti.

Neispunjenje uslova za doznaku II (druge) tranše finansiranja ne obavezuje korisnika na povrat prethodno doznačenih sredstava I (prve) tranše finansiranja.

Nezadovoljna stranka ima pravo izjaviti žalbu Drugostepenoj Komisiji Općinskog vijeća Ilijaš u roku od 8 (osam) dana od dana dostavljanja prvostepenog akta: Rješenja kojim se odobrava ili odbija podsticaj, ili Zaključka kojim se obustavlja postupak utvrđivanja prava na podsticaj.

Žalba se predaje putem organa koji je donio prvostepeni akt, neposredno, usmeno na zapisnik ili poštom preporučeno

OBAVEZE KORISNIKA PODSTICAJA

Član 7.

Korisnik podsticaja je u obavezi dodjeljena finansijska sredstva iskoristiti u svrhu obavljanja registrovane djelatnosti, uz zabranu upotrebe sredstava u sljedeće svrhe:

- djelatnost u sektorima ribarstva i akvakulture;
- djelatnost u sektoru poljoprivrede;
- djelatnost usmjerena izvozu, odnosno djelatnost direktno povezana s izvezenim količinama, s uspostavom i funkcionisanjem distributivne mreže ili s drugim tekućim troškovima povezanim s izvoznom djelatnošću;
- uslovljavanje upotreba domaćih proizvoda umjesto uvezenih;
- nabavku vozila za cestovni prijevoz tereta.

Općina Ilijaš će sa korisnicima podsticaja sklopiti pojedinačne Ugovore o međusobnim pravima i obavezama, koji će sadržavati sljedeće: iznos sredstava koja se dodjeljuju korisniku podsticaja, namjene korištenja sredstava, rok za utrošak sredstava, način i rok izvještavanja, te sankcije za nepoštivanje Ugovora.

NAČIN PODNOŠENJA PRIJAVA

Član 8.

Prijava na Javni poziv se ostvaruje podnošenjem uredno popunjenog i potpisanog Obrasca zahtjeva za ostvarenje prava na podsticaj. Prijem zahtjeva se vrši putem protokola Općine Ilijaš, 126.ilijaške brigade br.6., Ilijaš.

Aplikant koji nije priložio potrebne dokaze iz člana 5., tačke e), f), g), h), i) i j) ovog Pravilnika u momentu podnošenja Zahtjeva za ostvarenje prava na podsticaj ima pravo na dopunu podneska, tako što će biti pozvan putem Službe za privredu i finansije, da u datom roku ne dužem od 10 (deset) dana, od dana prijema obavijesti, otkloni utvrđene nedostatke.

Član 9.

OSTALE ODREDBE

Općina Ilijaš ne snosi troškove aplikacija, koji su nastali u postupku prijave na Javni poziv.
Općina Ilijaš ne snosi odgovornost u vezi sa radnjama koje je aplikant poduzeo u postupku prijave na Javni poziv.

Prispjela dokumentacija uz prijavu na Javni poziv se ne vraća aplikantu.

ZAVRŠNE ODREDBE

Član 10.

Ovaj Pravilnik stupa na snagu danom donošenja.

Broj: 01/2-11-530/22
Ilijaš: 15.03.2022. godine

OPĆINSKI NAČELNIK

Akif Fazlić, dipl.oec, s.r.

Dostaviti:

1. Za objavu putem web stranice Općine
2. Za objavu na Oglasnoj tabli Općine
3. Odsjek za finansije, Služba za privredu i finansije
4. U predmet